


Invitacion pa Diadomingo 13 di juni na
MANA
Investigadornan di Universidad di Leiden
lo duna un presentacion





ORANJESTAD (AAN): Den e ultimo dos siman, partinan di e coleccion na Museo Arqueologico Nacional Aruba (MANA) ta ser investiga door di colaboradornan di investigacion di Universidad di Leiden y Departamento Cientifico di MANA. E investigacion aki ta un parti di e proyecto cientifico VICI 'Communicating communities' cu ta ser financia door di Organizacion Hulandes pa Investigacion Cientifico (NWO). E proyecto ta ser encabeza pa Prof. Dr. Corinne Hofman y ta ser realiza hunto cu e facultad di Arqueologia di Universidad di Leiden. E proyecto na Aruba tin como meta pa investiga material di skelet humano, ceramica y litico (piedra) di diferente lugar arqueologico.

Diadomingo awor dia 13 di juni di 11.00 am te 12.00 pm lo tin un presentacion tocante e investigacion aki cual lo ser duna door di Dr. Sebastiaan Knippenberg y Drs. Hayley Mickleburgh. E exposicion permanente di MANA tambe lo ta habri di 10.00 am-2.00 pm.

Dr. Knippenberg ta dedica na investiga e uzo, distribucion y origen di artefactonan di piedra den Caribe, especialmente "greenstone" (p.e. jade, jadeite, nephrite, amazonite etc.) y "chert/flint" (vuursteen). E ta trata di averigua for di unda e piedranan ta bin y con hopi intercambio tabata tin entre e diferente sitonan local, entre e islanan di Caribe, pero tambe entre e islanan y tera firme. For di investigacionnan anterior cu el a haci na parti nort di Antiya Menor, a resulta cu hopi material di piedra a ser hanya door di intercambio entre e islanan. Na Aruba e ta concentra na prome lugar riba e manera di usa e "kiezelgesteentes", manera "chalcedon" y "jasper". E piedranan aki no ta aparce den naturalesa di Aruba. Esey ta duna di pensa cu nan mester a ser treci for di otro lugar door di e Indiannan.

Door di e investigacion aki



Dr. Knippenberg lo por haya mas informacion tocante e orgin di e piedranan aki, cual lo mustra con e Indiannan a explota nan recursonan natural, cualnan tabata posible rutanen di comercio y ki nivel social-politico tabata tras di e contactonan aki. Tambe Dr. Knippenberg ta investiga e uso "jade" na Aruba cual ta aparce solamente na algun parti di e continente y na Cuba y Santo Domingo.

Drs. Hayley Mickleburgh su investigacion ta tocante e manera di alimentacion di e prome habitantenan uzando tecnicanan di analisis arqueologico y fisico antropologico.

Pa e proyecto na Aruba, e ta investigando e djentenan di

skeletnan humano colecta na lugarnan arqueologico manera Malmok, Flip Tanki, Santa Cruz y Canashito. Tur e lugarnan hunto ta representa un diversidad cronologico y cultural, cual ta esencial den e proyecto cientifico VICI 'communicating communities'. E investigacion na Aruba ta parti di un investigacion Pan-caribeño, unda material arqueologico di esqueleto humano di Cuba, República Dominicana, Puerto Rico y otro lugarnan na Antiyanan Menor y Mayor ta ser investiga pa por haya un mihor comprension di e diferencianan y similaridadnan den e dieta prehistorico den nos region.